

PUBLICADO UN SIGNIFICATIVO INFORME POLO CES O ESTADO DA COSTA NA COMARCA DO SALNÉS

POR EMÍLIO XOSÉ ÍNSUA

O Colectivo Ecoloxista do Salnés (CES) fixo público en datas recentes, a través das páxinas do seu boletín O BUGALLO (nº 13), un detalladísimo informe sobre o estado da costa na comarca do Salnés, centrado sobre todo no Espazo Protexido Úmia-Ogrove (catalogado no convénio Ramsar de 1990), que abranxe territorio dos concellos de Cambados, Meaño, Sanxenxo e Ogrove.

A principal conclusión deste informe é, certamente, un tanto descorazonadora: a declaración de espazo protexido para a zona, que data de xuño de 1995, non está a servir, en absoluto, para garantir nen a súa protección nen a súa conservación. Recheos, vertidos, ocupacións ilegais e urbanizacións, principalmente, agreden de xeito constante, e na maioría dos casos irreversíbel, este espazo costeiro singular do noso país.

A enseada Úmia-Ogrove é unha zona de altísimo valor ornitolóxico, mais tamén paisaxístico e xeomorfolóxico, destacando nela a enorme diversidade de plantas adaptadas a medios salinos e a variada fauna mariña que acolle.

O estudo realizado polo CES distingue varios tramos no litoral. No primeiro deles, que vai da Torre de San Sadurniño á Ponte de Castrelo, en Cambados, as principais agresións son o vertido de augas fecais urbanas (a pesar

de que no municipio existe depuradora...) e diversos recheos, rampas e muros que invaden a costa. Curiosamente, neste pasado verao, unha zona do concello de Cambados que non incluía o informe do CES, a de Tragove, foi vítima de constantes vertidos contaminantes, denunciados oportunamente tanto polo propio CES como por mariscadores e propietarios de depuradoras de marisco. O carácter contaminante deses vertidos foi unha e outra vez negado polas autoridades municipais cambadesas.


O segundo dos tramos, desde a Ponte de Castrelo á Punta Ansuña, por onde corre a canle de desembocadura do Úmia, é o que mellor estado presenta, fóra dalgun que outro depósito de lixo ou algun pequeno intento de recheo. A principal ameaza vén da man dos vertidos das industrias instaladas nel (Conservas Miau, Cebifruit-Nitragal...). Desde a Punta Ansuña ao Bico da Ran, terceiro dos tramos do informe do CES, as agresións comezan a intensificar-se: un estaleiro invade totalmente unha pequena praia en O Facho; hai varios chalés en construción; producen-se vertidos fecais procedentes de pozos negros; etc.

No cuarto tramo, que vai do Bico da Ran á Ponte da Chanca (Meaño), as agresións máis importantes son a construción de casas, os recheos e os vertidos que contaminan os ríos e regatos que

desembocan neste tramo (Chanca, Francón, Carballa, etc.). Hai aquí, como verdadeiros puntos negros, un depósito de milleiros de pneumáticos usados, un recheo que serve de campo de fútbol e un desaugadoiro dun cocedeiro de mexillón.

O espazo costeiro que discorre entre a Ponte da Chanca e Cachadelos (Vilalonga-Sanxenxo) hai moito tempo que está completamente modificado pola acción humana, pois non en balde acolleu unha intensa actividade de extracción de arxilas para as telleiras e fábricas de cerámica da zona. En tempos recentes, a empresa "Nueva Cerámica Campo" ten feito graves estragos na costa, con construción de camiños e recheos que invaden o dominio público marítimo-terrestre, escavacións para a extracción de arxila, ademais de provocar unha preocupante contaminación ambiental pola emisión ao ar, sen axeitado tratamento, dos restos da queima de aceites usados que utiliza como combustible (uns 22.000 litros diarios...) na súa actividade. En total, sinala o informe do CES, a empresa "Nueva Cerámica Campo" ocupa sen licéncia nen concesión administrativa de nengunha caste un total de 13.630 metros cadrados de terreo do dominio público. É, pois, o maior axente destrutor e degradador da costa na Enseada Úmia-Ogrove. A esta situación, xa de por si ben triste, hai que engadir a alta contaminación que rexistra o regato Barbosa, por vertido de residuos líquidos urbanos procedentes do núcleo de Vilalonga.

**EN TEMPOS
RECENTES, A
EMPRESA "NUEVA
CERÁMICA CAMPO"
TEN FEITO GRAVES
ESTRAGOS
NA COSTA.**



Mamelo Soto

No sexto tramo, Cachadelos-Punta Surmuíño (Ogrove), a principal agresión vén dada pola tremenda presión urbanística que padecen as parroquias de Noalla (Sanxenxo) e Árdia (Ogrove), derivada da demanda turística, fundamentalmente. A isto hai que engadir o proxecto de prolongación da vía rápida até Ogrove, atravesando as marismas do río Recón, e a intención de ampliar a catro carris (25 metros de ancho...) a estrada que atravesa o Bao e o istmo da Lanzada, paradoxalmente obxecto de diversas actuacións rexeneradoras e de conservación nos últimos tempos... Vertidos de fosas sépticas na Revolta e a construción aberrante do Hotel Mourelos nas inmediacións do Bao completan este desolador panorama.

No penúltimo tramo contemplado no informe do CES, desde Punta Surmuíño á Ponte da Toxa, a presión urbanística segue a ser a principal fonte de problemas de deterioro do litoral, xunto cos recheos, os muros e os vertidos fecais. O derradeiro tramo, o do litoral da Illa da Toxa, non presenta infelizmente dados máis esperanzadores. O proceso de urbanización da illa segue a ser imparábel, do que dá boa proba o proxecto de ampliación do campo de golf existente na illa. O CES advirte, ademais, da posíbel contaminación por chumbo en case 150 metros, nas pozas do intermareal, provocada polos perdigóns que se utilizan nas competicións de tiro ao pichón que se celebran con certa frecuencia na Toxa.

O CES ten previsto realizar un novo informe dentro de dous anos, para avaliar a evolución e comprobar o tratamento que as administracións públicas deron nese tempo ás agresións, desfeitas e irregularidades denunciadas.

A COMENÉNCIA NOS TRAZADOS DA AUTOVIA DO NOROESTE

Coa excusa das impredecíbeis dificultades técnicas que poden sempre aparecer na construción dos túneis, ou coa de millor conectar a Autovia cos povos de Pedrafita, de Návía e Becerreá, e argumentando (unha vez que os terreos tiñan sido expropiados e as obras licitadas e adxudicadas) que os estudos de impacto ambiental do ano 1993 estaban "metodolóxicamente" mal feitos, a Dirección Xeral de Estradas vén de incrementar máis que notablemente os impactos da Autovia do Noroeste nos treitos de Becerreá ao Cereixal ao "acordar" uns cambios de trazado que, ademais do seu maior impacto, veñen mesmo a empeorar moi gravemente a calidade da vía. O resultado: máis povos partidos pola Autovia, un aciñeiral (o de Cadoalla) arrasado, un castro e unha vía romano-medieval desaparecida e unha Autovia que pasa a ter pendentes do 5%.

O que resulta máis especialmente ofensivo é comprobarmos -unha vez máis- que son as comenencias das empresas constructoras e as urxencias electorais as que, ao final,

deciden os trazados sen que de nada servan os estudos de Impacto Ambiental. Que, ademais, aquí se poda cambiar un trazado de Autovia unha vez iniciadas as obras e que non se poidera ter feito no treito anterior de Neira de Rei cando nen siquera as

obras tiñan sido licitadas nen os terreos expropiados resulta, comparativamente, unha indignante burla. Que, por riba, agora se xustifique o procedemento con base a que os estudos de Impacto Ambiental do 1993 estaban "metodolóxicamente" mal feitos, cando isto mesmo era o que nos alegabamos para evitar o trazado da Autovia polas beiras do

Rio Neira e polo Val de Neira de Rei constitúe, ademais dunha indignidade, unha provocación.

Por en evidencia este absoluto desprécio polos impactos ambientais foron as razóns que nos moveron a participar na denuncia destes cambios de trazado e a implicarnos na mobilización social en contra dos mesmo. Sabemos ben o difícil que resulta vencer a prepotencia da Administración, mais non por iso podemos quedar calados.

OS CÁMBIOS INCREMENTAN NOTABELMENTE OS IMPACTOS DA AUTOVIA DO NOROESTE ENTRE BECERREÁ E O CEREIXAL



Cerâmicas Campo distribue a súa "actividade ambiental" entre as fábricas do Salnés e de Laracha (esta na foto), consistente na queima de aceites, neumáticos e outros residuos.

Equilibio 3

a túa
Tenda Ecolóxica

Ronda de Nelle, 19 baixo
15007 A Coruña
Telf.: 981 15 36 08

Alimentación
biolóxica e a
millor oferta en
productos
respetuosos coa
Natureza e a
Saúde.
Herbas,
Papelería,
Librería,
Roupa,
Cosmética,
Hixiene,
Artesanía,
Comercio xusto